

ASEAN perlu pemimpin masa depan
Utusan Online
04 April, 2012

PHNOM PENH 4 April - Perdana Menteri, Datuk Seri Najib Tun Razak hari ini menekankan tentang pentingnya ASEAN memberi tumpuan kepada pembangunan insan, kreativiti dan hubungan dengan generasi muda bagi mengasah kepemimpinan yang bakal meneruskan kemajuan rantau.

Beliau berkata, ASEAN memerlukan pemimpin untuk meneroka peluang-peluang baru di peringkat global dan ketiga-tiga elemen itu penting bagi membuka jalan ke arah itu.

"Walaupun hari ini, kita berada di persimpangan dengan Kesatuan Eropah masih dibelenggu ribut ekonomi, ASEAN perlu berwaspada bagi mengelak masalah. Sebab itu amat penting sekarang untuk memastikan ASEAN mempunyai daya kepimpinan yang dapat membawa kita melepasi halangan agar kembali kuat dan lebih bersatu," katanya.

Pada masa negara maju mula membina semula kekuatan daripada kesilapan silam, dunia kini melihat Asia sebagai sumber penting pertumbuhan idea-idea segar dan perspektif baru.

"Sementara Amerika Syarikat masih menjadi kuasa besar dunia, setiap hari terdapat peluang baru untuk ASEAN melangkah setapak ke peringkat global - tetapi untuk melakukannya, kita perlu pemimpin," katanya.

Perdana Menteri berucap pada Forum Kepimpinan ASEAN Kesembilan bertemakan Satu Komuniti, Satu Tujuan - Membangunkan ASEAN untuk Berkongsi Kemakmuran anjuran Institut Strategi dan Kepimpinan Asia (ASLI) dan Kementerian Perdagangan dan Kerajaan Kemboja, yang bermula hari ini hingga 6 April ini di Hotel Cambodiana di sini.

Dalam ucaptamanya yang bertajuk 'Cabaran Kepimpinan ASEAN: Memenuhi Keperluan dan Jangkaan Masa Depan', Najib berkata, pembangunan insan adalah bidang penting yang mendesak untuk rantau ini meneruskan kemajuan ekonominya.

Malangnya kata beliau, tenaga kerja Asia kebanyakannya masih dikategorikan sebagai kurang mahir, kurang pengetahuan dan kurang peluang untuk meningkat ke tahap profesional.

Sebab itulah, katanya, pembangunan modal insan menjadi antara keutamaan Malaysia dalam mencapai matlamat negara berpendapatan tinggi menjelang 2020.

"Amat jelas yang kemajuan perlu dipacu oleh semua anggota ASEAN di pelbagai peringkat, dengan sekretariat gagasan itu, kerajaan-kerajaan dan komuniti perniagaan serantau saling bekerjasama," katanya sambil mengingatkan tidak ada salahnya mencontohi kejayaan Barat dalam mengeluarkan tenaga kerja mahir dan kesanggupan syarikat-syarikatnya membuat pelaburan besar dalam pembangunan sumber manusia.

Najib bagaimanapun sedar untuk merealisasikan, pemikiran pekerja dan majikan perlu terlebih dahulu diubah agar melihat pembangunan sumber manusia itu sebagai satu pelaburan masa panjang dan bukannya sekadar kos.

"Pekerja akan meningkatkan kemahiran untuk bersaing di pasaran global, kemahiran itu akan membantu majikan mengembangkan perniagaan dan sektor perniagaan yang lebih kukuh bermakna negara akan mendapat manfaat langsung menerusi peningkatan produktiviti dan secara tidak langsung daripada pelaburan asing (FDI)," katanya. - UTUSAN

Menyentuh elemen kreativiti pula, Perdana Menteri berkata, walaupun ASEAN menyaksikan pertumbuhan ekonomi yang pesat dan kemajuan menakjubkan, sebagaimana modal insan, ia masih kurang diberi perhatian.

"Pekerja kita mungkin berdedikasi tinggi, mampu bekerja keras dan memenuhi kehendak tetapi idea baru yang terbaik dan paling kreatif masih datang daripada sudut lain dunia," ujarnya.

Bagi Najib, mungkin sebahagian masalah ini berlaku kerana sekolah terlalu menyempitkan tumpuan kepada subjek-subjek tradisional dan tidak benar-benar memupuk sisi kreatif dan artistik golongan muda.

Beliau bagaimanapun tidak meletakkan sepenuh tanggungjawab ke bahu pihak sekolah sebaliknya mengingatkan yang semua pihak daripada ahli politik, usahawan, ibu bapa, guru dan pelajar perlu memainkan peranan masing-masing.

Dalam hal ini, Perdana Menteri menekankan pentingnya elemen ketiga iaitu keperluan untuk generasi muda menjadi lebih aktif, diperkasa dan dilibatkan dalam program serta inisiatif ASEAN sebagai pemimpin masa depan.

Bagaimanapun, katanya, kadangkala kelihatan seolah-olah ASEAN terpisah daripada golongan muda sehingga dianggap sebagai institusi yang asing dan tidak relevan kepada kehidupan mereka.

"Pemikiran seperti inilah yang perlu kita ubah. Kita perlu meningkatkan minat generasi muda kepada ASEAN dan membantu mereka melihat dan memahami kuasa dan potensi yang ada pada mereka dengan mengadakan program, projek dan inisiatif melibatkan mereka secara bermakna.

"Bercakap daripada pengalaman saya, ia lebih menyeronokkan untuk terlibat sama dan melihat sendiri faedah ASEAN daripada duduk sehingga larut malam mengarang esei untuk mereka," katanya.

Beliau percaya terdapat skop yang besar untuk menarik penglibatan belia dengan menggerakkan program-program baru di semua peringkat daripada pendidikan, geran kerajaan dan aktiviti yang ditaja ASEAN.

Perdana Menteri bagaimanapun masih yakin yang ASEAN mempunyai kepimpinan untuk melakukan transformasi, pembaharuan dan menyediakan penyelesaian kepada masalah serantau asalkan saling bekerjasama sesama negara anggota. - UTUSAN

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0405&pub=Utusan_Malaysia&sec=Muka_Hadapan&pg=mh_03.htm